

VENDIM
Nr. 3, datë 24.1.2017

**PËR PËRCAKTIMIN E PROCEDURËS DHE RREGULLAVE TË HEDHJES SË
SHORTIT PËR ZGJEDHJEN E ANËTARËVE TË KËSHILLIT TË EMËRIMEVE NË
DREJTËSI**

Në mbështetje të pikës 3 të nenit 149/d dhe pikës 11 të nenit 179 të Kushtetutës së Republikës së Shqipërisë, neneve 221 dhe 284 të ligjit nr. 115/2016 “Për organet e qeverisjes së sistemit të drejtësisë”, dhe të nenit 106 të Rregullores së Kuvendit të Republikës së Shqipërisë, Kryetari i Kuvendit,

VENDOSI:

KREU I
**RREGULLA TË PËRGJITHSHME PËR ORGANIZIMIN E PROCEDURËS SË HEDHJES SË
SHORTIT.**

1. Miratimin e procedurës dhe rregullave të hedhjes së shortit për zgjedhjen e anëtarëve të Këshillit të Emërimeve në Drejtësi.

2. Hedhja e shortit për zgjedhjen e anëtarëve të Këshillit të Emërimeve në Drejtësi i nënshtrohet parimeve të transparencës, gjurmueshmërisë dhe monitorimit të këtij procesi.

3. Për organizimin e procedurave të hedhjes së shortit dhe dokumentimin e çdo faze të saj krijohet një Sekretariat Teknik. Numri i anëtarëve dhe përbërja e Sekretariatit Teknik caktohen nga Sekretari i Përgjithshëm i Kuvendit të Shqipërisë.

4. Kryetari i Kuvendit të Shqipërisë cakton datën dhe orën e organizimit të shortit.

Data dhe ora e organizimit të shortit publikohet në faqen zyrtare të Kuvendit të Shqipërisë.

5. Kryetari i Kuvendit njofton zyrtarisht për datën dhe orën e organizimit të shortit Prokurorin e Përgjithshëm, Sekretarin e Përgjithshëm të Këshillit të Lartë të Drejtësisë, Kryetarin e Gjykatës së Lartë dhe Kryetarin e Gjykatës Kushtetuese, të cilët ftohen të dërgojnë përfaqësuesit e tyre për të qenë prezent në organizimin e shortit.

Përfaqësuesit e këtyre institucioneve të caktuar për të marrë pjesë në organizimin e shortit nuk duhet të jenë të njëjtë me personat e përfshirë në listën e kandidatëve të paraqitur për Këshillin e Emërimeve në Drejtësi.

6. Për zhvillimin e procedurës së hedhjes së shortit njoftohet dhe ftohet të marrë pjesë si vëzhgues Avokati i Popullit, përfaqësues të grupeve parlamentare, përfaqësitë e huaja diplomatike të akredituara në Republikën e Shqipërisë, organizata partnere ndërkombëtare dhe media.

7. Në datën dhe orën e caktuar për organizimin e shortit, Sekretariati Teknik sigurohet paraprakisht për praninë e:

a) përfaqësuesve të dërguar nga institucionet e përcaktuara nga neni 284 i ligjit nr.115/2016 “Për organet e qeverisjes së sistemit të drejtësisë”;

b) Avokatit të Popullit ose të përfaqësuesit të autorizuar prej tij;

c) Përfaqësuesve të grupeve parlamentare, të përfaqësive të huaja diplomatike të akredituara në Republikën e Shqipërisë dhe të organizatave partnere ndërkombëtare, në cilësinë e vëzhguesve; dhe i fton ata të zënë vendet e caktuara.

Në datën dhe orën e caktuar për organizimin e shortit mund të marrin pjesë edhe kandidatët e propozuar nga institucionet e përcaktuara nga neni 284 i ligjit nr. 115/2016 “Për organet e qeverisjes së sistemit të drejtësisë”.

8. Mosparaqitja e përfaqësuesve të institucioneve të përcaktuara nga neni 284 i ligjit nr. 115/2016 “Për organet e qeverisjes së sistemit të drejtësisë” nuk pezullon procedurat e hedhjes së shortit. Në këtë

rast tërheqja e shortit për institucionin përfaqësuesi i të cilit nuk është prezent bëhet nga përfaqësuesi i një institucioni tjetër dhe në rast se edhe këto mungojnë Sekretari i Përgjithshëm i Kuvendit cakton një punonjës të shërbimeve të Kuvendit për të tërhequr shortin për institucionin, përfaqësuesi i të cilit nuk është prezent.

KREU II PROÇESI I HEDHJES SË SHORTIT

9. Shorti organizohet në dy kuti transparente. Në njërin prej kutive vendosen goglat dhe në kutinë tjetër më pas vendosen goglat në të cilat janë futur shiritat e letrës ku janë shënuar emrat e kandidatëve të propozuar nga secili institucion sipas listës së përcjellë Kuvendit të Shqipërisë.

10. Shiritat e letrës me emrat e kandidatëve futen në gogla. Numri i goglave duhet të përputhet me numrin e kandidatëve të propozuar nga secili institucion, sipas listës përcjellë Kuvendit të Shqipërisë.

11. Radha e futjes së goglave në kuti dhe rrada e hedhjes së shortit përcaktohet duke u mbështetur në renditjen e mëposhtme:

- a) kandidatë të Gjykatës Kushtetuese;
- b) kandidatë të Gjykatës së Lartë;
- c) kandidatë nga Prokuroria e Përgjithshme;
- ç) kandidatë nga gjykatat e apelit;
- d) kandidatë nga zyrat e prokurorisë pranë gjykatave të apelit;
- dh) kandidatë nga gjykatat administrative.

12. Përfaqësuesit e institucioneve të përcaktuara nga neni 284 i ligjit nr.115/2016 “Për organet e qeverisjes së sistemit të drejtësisë” tërheqin nga kutia përkatëse me rradhë goglat.

Përfaqësuesi pasi e hap goglën, e lexon me zë të lartë emrin e kandidatit për Këshillin e Emërimeve në Drejtësi që është i shënuar në të dhe ia tregon Sekretariatit Teknik dhe të gjithë përfaqësuesve pjesëmarrës emrin.

Shiriti i letrës që gjendet brenda saj, i dorëzohet Sekretariatit Teknik.

13. Kandidati, emri i të cilit është shënuar në shiritin e letrës, do të jetë anëtar i Këshillit të Emërimeve në Drejtësi.

14. Me të njëjtin short dhe të njëjtën procedurë, të parashikuar nga pikat 9 deri në 13 të këtij vendimi, zgjidhen edhe një anëtar zëvendësues nga secili institucion sipas parashikimeve të pikës 7 të nenit 221, të ligjit nr. 115/2016 “Për organet e qeverisjes së sistemit të drejtësisë”.

15. Pas tërheqjes së goglave nga përfaqësuesi i parë, kutia transparente zbrazet dhe në të futen goglat me emrat e kandidatëve të dërguar nga institucioni tjetër sipas rradhës së caktuar në pikën 11 të këtij vendimi.

16. Rezultati i Shortit shpallet nga Kryetari i Kuvendit të Shqipërisë.

17. Procedura e hedhjes së shortit regjistrohet në audio dhe video.

18. Për dokumentimin e çdo faze të procedurës së organizimit dhe hedhjes së shortit sipas parashikimeve të këtij vendimi mbahet procesverbal.

19. Rezultatet e shortit së bashku me një relacion për procesin e organizimit të shortit bëhen menjëherë publike në faqen zyrtare të internetit të Kuvendit të Shqipërisë.

20. Avokati i Popullit bën menjëherë publik në faqen zyrtare të institucionit raportin e monitorimit të procesit të shortit.

21. Ngarkohet Sekretari i Përgjithshëm i Kuvendit dhe Sekretariati Teknik për ndjekjen e procedurave të nevojshme të zbatimit të këtij vendimi.

Ky vendim hyn në fuqi menjëherë dhe botohet në Fletoren Zyrtare.

KRYETARI

